



Կարգապահական գործ թիվ ԿԳ-23032

Հայաստանի Հանրապետության փաստաբանների պալատի
կարգապահական հանձնաժողովի

Ո Ր Ո Շ ՈՒ Մ

**ՓԱՍՏԱԲԱՆ ՍԱՐԳԻՍ ԽԱԶԱՏՈՒՐԻ ԽԱԶԱՏՐՅԱՆԻՆ ԿԱՐԳԱՊԱՀԱԿԱՆ
ՊԱՏԱՍԽԱՆԱՏՎՈՒԹՅԱՆ ԵՆԹԱՐԿԵԼՈՒ ՀԱՐՑԸ ՔՆՆԱՐԿԵԼՈՒ ՄԱՍԻՆ**

Հայաստանի Հանրապետության փաստաբանների պալատի կարգապահական հանձնաժողովը (**այսուհետ նաև՝ Հանձնաժողով**), Հանձնաժողովի նախագահ, զեկուցող՝ Տաթևիկ Շալջյանի, Հանձնաժողովի անդամներ՝ Վերոնիկա Ալեքսանյանի, Վահե Աստվածատրյանի, Միքայել Դանիելյանի, Գուրգեն Թորոսյանի, Հայկ Սահակյանի և Վահագն Քեչիշյանի կազմով,

քարտուղարությամբ՝ Նոննա Համբարձումյանի,
մասնակցությամբ՝ Ռուբեն Շահինյանի,

քննության առնելով փաստաբան Սարգիս Խաչատուրի Խաչատրյանի (**այսուհետ նաև՝ Փաստաբան կամ Պատասխանող**) (արտոնագիր՝ թիվ 1438), կարգապահական պատասխանատվության ենթարկելու վերաբերյալ հարցը՝

Պ Ա Ր Զ Ե Ց՝

1. Կարգապահական վարույթ հարուցելու առիթը և հիմքը.

Ռուբեն Շահինյանը (**այսուհետ՝ նաև Դիմող**), դիմելով Հայաստանի Հանրապետության փաստաբանների պալատ (**այսուհետ՝ նաև Պալատ**), հայտնել է, որ իր իրավունքների պաշտպանության համար 18.06.2022թ. դիմել է փաստաբան Սարգիս Խաչատրյանին: Փաստաբանը ծառայությունների դիմաց պահանջել է 200.000 ՀՀ դրամ, որը Դիմողի կողմից վճարվել է ըստ պայմանավորվածության:

Դիմողի պնդմամբ, փաստաբանը վստահեցրել է, որ գործն ընթացքի մեջ է և կարող են լինել դեպքեր, երբ Datalex դատական տեղեկատվական համակարգում գործի վերաբերյալ տեղեկություններ չարտացոլվեն:

Դիմողը հայտնել է նաև, որ փաստաբանը մեկ տարվա ընթացքում կապ չի հաստատել իր հետ, զանգերին և հաղորդագրություններին չի պատասխանել՝ պայմանավորված տարբեր ընտանեկան խնդիրներով և ծանրաբեռնվածությամբ:

Ըստ Դիմողի՝ փաստաբանն իրեն հայտնել է, որ վերջին դատական նիստը կայացել է 27.06.2023թ., սակայն մինչ օրս չի պատասխանել Դիմողի զանգերին, որպեսզի հնարավոր լինի պարզել գործի ընթացքը:

Միաժամանակ, սույն կարգապահական վարույթի օրինականությունն ապահովելու և

Թիվ ԿԳ-23032-2-Ա

10.01.2024թ.

արդարացի լուծման համար նշանակություն ունեցող հանգամանքները բացահայտելու նպատակով՝ 14.09.2023թ. Դիմողին առաջարկվել է՝ Օրենքի 39.5 հոդվածի 4-րդ մասին համապատասխան, գրությունը ստանալու պահից մեկշաբաթյա ժամկետում ներկայացնել կարգապահական վարույթի համար անհրաժեշտ ապացույցներ:

Դիմողը 10.10.2023թ. գրությամբ ներկայացրել է քաղվածք զանգերի վերծանումներից, որի համաձայն ինքը կատարել է զանգեր և ուղարկել է հաղորդագրություն 098100801 հեռախոսահամարին:

2. Պատասխանողի համառոտ բացատրությունները.

Մինչև կարգապահական վարույթ հարուցելու հարցի լուծումը փաստաբան Սարգիս Խաչատրյանին առաջարկվել է՝ «Փաստաբանության մասին» օրենքի **(այսուհետ նաև՝ Օրենք)** 39.3-րդ հոդվածի 2-րդ մասի համաձայն, ներկայացնել բացատրություն Ռուբեն Շահինայնի դիմումի վերաբերյալ, սակայն վերջինիս կողմից բացատրություն չի ներկայացվել:

Միաժամանակ, սույն կարգապահական վարույթի օրինականությունն ապահովելու և արդարացի լուծման համար նշանակություն ունեցող հանգամանքները բացահայտելու նպատակով՝ 14.09.2023թ. Փաստաբանին առաջարկվել է՝ Օրենքի 39.5 հոդվածի 4-րդ մասին համապատասխան, գրությունը ստանալու պահից մեկշաբաթյա ժամկետում ներկայացնել կարգապահական վարույթի համար անհրաժեշտ ապացույցներ, սակայն Փաստաբանի կողմից որևէ լրացուցիչ ապացույց չի ներկայացվել:

3. Կարգապահական վարույթ հարուցելու մասին որոշումը.

Պալատի նախագահի 31.08.2023թ. թիվ 220-Ա/ԿԳ-23032 որոշմամբ փաստաբան Սարգիս Խաչատրյանի նկատմամբ Օրենքի **19-րդ հոդվածի 2-րդ կետի**, ինչպես նաև Պալատի ընդհանուր ժողովի 2019 թվականի հոկտեմբերի 19-ի թիվ 1-Լ որոշմամբ հաստատված փաստաբանի վարքագծի կանոնագրքի **(այսուհետ նաև՝ Կանոնագիրք)** 3.6.1 ենթակետի խախտման հատկանիշներով հարուցվել է կարգապահական վարույթ:

05.09.2023թ. կարգապահական գործի նախապատրաստումը հանձնարարվել է Պալատի աշխատակազմի սպասարկող անձնակազմի աշխատակից՝ Գարիկ Հախնազարյանին **(այսուհետ՝ նաև Աշխատակից)**:

17.10.2023թ. կարգապահական գործի նախապատրաստումը վերամակագրվել է Պալատի աշխատակազմի սպասարկող անձնակազմի աշխատակից՝ Հայկ Ծատուրյանին:

3.1. Վկաների ցուցմունքները.

Սույն կարգապահական գործով վկաներ չեն հրավիրվել:

4. Կարգապահական գործ նախապատրաստող Աշխատակցի եզրակացությունը և գործի հանձնումը Հանձնաժողովին.

Գործի նախապատրաստման արդյունքում Աշխատակիցը 03.11.2023թ. կազմել է եզրակացություն:

Կարգապահական գործը Պալատի Հանձնաժողովին է հանձնվել 03.11.2023թ.:

Եզրակացությամբ հաստատված է համարվել, որ Դիմողը 21.06.2022թ.-ից մինչև 09.08.2023թ. ընկած ժամանակահատվածում շուրջ 13 անգամ զանգահարել է և 1 անգամ ուղարկել է հաղորդագրություն պայմանագրում նշված՝ 098100801 հեռախոսահամարին, իսկ Փաստաբանն իր հերթին պատասխանել է նշված զանգերին:

Հանձնաժողովի նիստերը տեղի են ունեցել 07.12.2023թ. ժամը 19:30 և 10.01.2024թ. ժամը 19:30-ին ՀՀ փաստաբանների պալատի վարչական շենքում (ք.Երևան, Զաքյան 7-2, 4-րդ հարկ, թիվ 12 սենյակ):

5. Գործի հանգամանքները՝ առկա ապացույցների վկայակոչմամբ.

Հանձնաժողովը, ուսումնասիրելով գործում առկա ապացույցները, հաշվի առնելով նաև կարգապահական գործը նախապատրաստող Աշխատակցի եզրակացությունը, հաստատված է համարում հետևյալ փաստերը.

1. Փաստաբանը ստանձնել է Դիմողի իրավունքների ու շահերի պաշտպանությունը: *Նշված փաստը հաստատվում է Դիմողի և Փաստաբանի 18.06.2022թ. միջև կնքված իրավաբանական ծառայությունների մատուցման № 45 պայմանագրով:*

2. Դիմողը 21.06.2022թ.-ից մինչև 09.08.2023թ. ընկած ժամանակահատվածում շուրջ 13 անգամ զանգահարել է և 1 անգամ ուղարկել է հաղորդագրություն պայմանագրում նշված՝ 098100801 հեռախոսահամարին, իսկ Փաստաբանն իր հերթին պատասխանել է նշված զանգերին: *Նշված փաստը հաստատվում է Դիմողի կողմից ներկայացրած «ՄՏՍ ՀԱՅԱՍՏԱՆ» ՓԲԸ-ի կողմից տրված զանգերի վերածնման քաղվածքով, ինչպես նաև 18.06.2022թ. պայմանագրով:*

6. Պատասխանողի անձը բնութագրող հանգամանքները.

Պալատի աշխատակազմի ղեկավարի կողմից տրված տեղեկանքի համաձայն՝ Սարգիս Խաչատրյանը փաստաբան է հանդիսանում 14.07.2012 թվականից, և 2019-2023թթ. ընկած ժամանակահատվածում ունի 1 կարգապահական տույժ:

7. Պալատի Հանձնաժողովի պատճառաբանված եզրակացությունը և որոշումը.

Հանձնաժողովը գտնում է, որ փաստաբան Սարգիս Խաչատրյանի նկատմամբ Օրենքի 19-րդ հոդվածի 2-րդ կետի, ինչպես նաև Կանոնագրքի 3.6.1 ենթակետի պահանջների խախտման հատկանիշներով հարուցված կարգապահական վարույթը ենթակա է կարճման՝ հետևյալ պատճառաբանությամբ.

Օրենքի 19-րդ հոդվածի 2-րդ կետի համաձայն՝ փաստաբանը պարտավոր է՝ պահպանել Օրենքի, փաստաբանի վարքագծի կանոնագրքի և փաստաբանների պալատի կանոնադրության պահանջները:

Օրենքի 39-րդ հոդվածի 1-ին մասի համաձայն՝ փաստաբանը ենթակա է կարգապահական պատասխանատվության սույն օրենքի և փաստաբանի վարքագծի կանոնագրքի պահանջները խախտելու համար, ... :

Օրենքի 39-րդ հոդվածի 2-րդ մասի համաձայն՝ Փաստաբանի նկատմամբ կարգապահական վարույթն իրականացվում է օրինականության, օրենքի և

փաստաբանների պալատի առջև հավասարության, մրցակցության, կատարված կարգապահական խախտման համար նշանակվող կարգապահական տույժի համաչափության և անմեղության կանխավարկածի սկզբունքների հիման վրա:

Օրենքի 39.1-ին հոդվածի 1-ին մասի 1-ին և 2-րդ կետերի համաձայն՝ փաստաբանին կարգապահական պատասխանատվության ենթարկելու հիմքերն են՝ սույն օրենքի պահանջների խախտումը, որը կատարվել է դիտավորությամբ կամ կոպիտ անփութությամբ, ինչպես նաև փաստաբանի վարքագծի կանոնադրի պահանջների խախտումը, որը կատարվել է դիտավորությամբ կամ կոպիտ անփութությամբ:

Օրենքի 39.1-ին հոդվածի 5-րդ մասի համաձայն՝ Փաստաբանը ենթակա չէ կարգապահական պատասխանատվության մեղքի բացակայության դեպքում:

Օրենքի 39.1-ին հոդվածի 6-րդ մասի համաձայն՝ կարգապահական խախտման համար փաստաբանը համարվում է անմեղ, քանի դեռ նրա մեղքն ապացուցված չէ սույն օրենքով սահմանված կարգով՝ Կարգապահական հանձնաժողովի՝ կարգապահական պատասխանատվության ենթարկելու մասին ուժի մեջ մտած որոշմամբ: Փաստաբանի կատարած կարգապահական խախտման վերաբերյալ չփարատված կասկածները մեկնաբանվում են փաստաբանի օգտին:

Օրենքի 39.9-րդ հոդվածի 1-ին մասի 1-ին կետի համաձայն՝ Փաստաբանների պալատի կարգապահական հանձնաժողովը կարծում է փաստաբանին կարգապահական պատասխանատվության ենթարկելու վերաբերյալ վարույթն այն դեպքում, երբ՝ առկա չէ կարգապահական պատասխանատվության ենթարկելու հիմք:

Վերոնշյալի հաշվառմամբ, Հանձնաժողովը գտնում է, որ կարգապահական պատասխանատվության հիմք չի կարող լինել միայն ենթադրյալ իրավախախտման մասին դիմողի պնդումը, որը հիմնավորված չէ այնպիսի հանգամանքների վկայակոչմամբ և (կամ) ապացույցներով, որոնք հաստատապես կվկայեն փաստաբանի կողմից Օրենքի և/կամ Կանոնադրի պահանջների խախտման կատարման մասին:

Կանոնադրի 3.6.1-րդ ենթակետի համաձայն՝ Փաստաբանը պարտավոր է կանոնավորապես տեղեկացնել վստահորդին հանձնարարության կատարման ընթացքի մասին և պատասխանել նրան հետաքրքրող հարցերին:

Վկայակոչված կանոնի վերլուծության արդյունքում պարզ է դառնում, որ փաստաբանի և իր վստահորդի միջև հարաբերություններում պետք է ապահովվի անհրաժեշտ որոշակիություն և կանխատեսելիություն՝ իրավական երաշխիքներ ստեղծելով կողմերի համար: Այդ կապակցությամբ, փաստաբանի համար վստահորդի իրավունքները և օրինական շահերը բարեխիղճ և ժամանակին պաշտպանելուց բացի, սահմանվում են նաև այլ պարտականություններ, որոնք նա պետք է իրականացնի հանձնարարության կատարման ընթացքում՝ մասնավորապես, տեղեկացնել վստահորդին հանձնարարության կատարման ընթացքի մասին և պատասխանել վստահորդին հետաքրքրող հարցերին:

Սույն կարգապահական գործի շրջանակներում, Դիմողի կողմից ներկայացված բացատրությունների և ապացույցների ուսումնասիրության արդյունքներով Հանձնաժողովը արձանագրում է, որ սույն կարգապահական գործի քննության ընթացքում չեն ներկայացվել այնպիսի ապացույցներ, որոնցով կհաստատվեր Պատասխանողի կողմից Կանոնադրի 3.6.1 ենթակետի խախտում թույլ տալու հանգամանքը: Ավելին, Դիմողի կողմից ներկայացրած «ՄՏՍ ՀԱՅԱՍՏԱՆ» ՓԲԸ-ի կողմից տրված զանգերի վերձանման

քաղվածքից հետևում է, որ Դիմողը 21.06.2022թ. մինչև 09.08.2023թ. ընկած ժամանակահատվածում շուրջ 13 անգամ զանգահարել է և 1 անգամ ուղարկել է հաղորդագրություն պայմանագրում նշված՝ 098100801 հեռախոսահամարին, իսկ Փաստաբանն իր հերթին պատասխանել է նշված զանգերին:

Հանձնաժողովը նաև ի գիտություն է ընդունում, որ 10.01.2024թ. Ռուբեն Շահինյանը, դիմելով Հայաստանի Հանրապետության փաստաբանների պալատ, հայտնել է, որ իր և փաստաբան Սարգիս Խաչատրյանի միջև տեղի էր ունեցել թյուրիմացություն, որը հարթվել է:

Վերոնշյալը հիմք ընդունելով՝ Հանձնաժողովն արձանագրում է, որ փաստաբանի կողմից Կանոնագրքի 3.6.1 ենթակետի խախտում թույլ տալու փաստը չի հաստատվել:

Վերոգրյալից ելնելով և ղեկավարվելով Օրենքի 11.1-րդ հոդվածի 3-րդ մասով, 39.7-րդ հոդվածի 5-րդ մասի 2-րդ կետով և 7-րդ մասով, 39.9-րդ հոդվածի 1-ին մասի 1-ին կետով, Հանձնաժողովը՝

Ո Ր Ո Շ Ե Ց

1. Փաստաբան Սարգիս Խաչատրյանի (արտոնագիր՝ թիվ 1438) նկատմամբ Օրենքի 19-րդ հոդվածի 2-րդ կետի, ինչպես նաև Կանոնագրքի 3.6.1 ենթակետի պահանջների խախտման հարկանիշներով հարուցված թիվ ԿԳ-23032 կարգապահական վարույթը կարճել:

2. Հանձնարարել Հանձնաժողովի նիստերի քարտուղարին՝ սույն որոշման մասին իրազեկել կողմերին:

Ծանոթություն. Սույն որոշումը կարող է բողոքարկվել ՀՀ փաստաբանների պալատի խորհուրդ կամ դատական կարգով այն ստանալու օրվանից մեկամսյա ժամկետում: Սույն որոշումն ուժի մեջ է մտնում այն փաստաբանի կողմից ստանալու հաջորդ օրվանից:

**ՀՀ փաստաբանների պալատի
կարգապահական հանձնաժողովի
նախագահ՝**

Տաթևիկ Շալջյան

**Թիվ ԿԳ-23032-2-Ա
10 հունվարի 2024թ.
ք.Երևան**